



Isertitat annertussusaat malillugit utoqqalinermi soraarnerussutisiat ilanngarneqartarunnaarlutilluunniit atorunnaarsinneqartarunnaarsillugit, Naalakkersuisut utoqqalinersiaqarneq pillugu Inatsisartut inatsisaannut allannguutissatut siunnersuummik suliaqarnissamik peqquneqarnissaannik Inatsisartunut aalajangiiffigisassatut siunnersuut. Allaannguutissatut siunnersuut UKA 2026-mi saqqummiunneqassaaq. (Inatsisartunut Ilaasortaq Mariane Paviasen Jensen, Inuit Ataqtigiiit) (Siullermeerineq)

Inatsisartunut ilaasortap Mariane Paviasen Jensen-ip siunnersuutaanut qujanaq.

Siullermik inuiaqatitsinnut utoqqarnut ataqqinningaarneput, qujamasunnerpullu Demokraatinit ersersikkusupparput. Ullumikkut inuiaqatigiisugut utoqqaat pilersitaraat. Sulerulussimapput. Akisussaaffimmik tiguisimapput. Kinguaariit tullii perorsarsimavaat, ilinniartissimallugillu. Misilittakkatillu tamatsinnut ingerlateqqillugit. Utoqqaat nersorneqartariaqarlutillu ataqqineqartariaqarput, ataqqinassusilimmillu aamma toqqissisimasumik utoqqaanissaminut periarfissinneqartariaqarlutik.

Siunnersuuteqartup pingaarutalik eqqartorpaa. Utoqqaat utoqqalinersiaqalernissamut ukiorititanik ukiullit sulii sulerusussuseqarlutillu sulii sulisinnaassuseqartut amerlaqaat. Inuiaqatigiittut pisariaqartitatsinnik nalituunik ilisimasaqarlutillu misilittagaqarput. Utoqqalinersiat millisinnerisigut sulinissaannut periarfissaat killileraanni, tunniussisinnaanerat annaaginnarnagu ataatsimooritsinnut peqataanerat, peqataarusussuseqaannarnerallu aamma annaassavagut. Tamanna naleqqunnanilu inuiaqatigiit aningaasaqarnerinut naleqqutinnigilaq.

Tamanna pillugu utoqqaat sulisinnaasut, sulinnarusuttullu sivisunerusumik sulisinnaanissaminut periarfissagissaarnerunissaannik kissaateqarnermut Demokraatit isumaqataapput. Utoqqalinersiaqaraanni suleqqusaajunnaarnermik kinguneqartariaqanngikkaluarpoq. Utoqqarnut tapertaarusuttunut inuiaqatigiit akuersaarnissaat aamma tapersersuinissaat, ilutigisaanillu suliiunnaarusuttunut ataqqinninnissaat pingaaruteqarpoq.

Taakkua oqaatigereerlugit Demokraatinit isumaqarpugut, aaqqiigallarnarit pinngitsoorniassagatsigit utoqqalinersiaqarneq tamaat isigigaanni isumatusaarnerussasoq. Anginerusumik ataqtigimmik aaqqissuussinermi utoqqalinersiat pingaarutillit ilagaat. Taamaattumik utoqqalinersiaqartariaaseq pisariitsoq, naapertuilluartoq, aningaasaqarnikkullu oqimaaqatigiittoq qulakkeerniassagatsigu, ataatsimoortumik aaqqissuusseqqinneq ataqtigiiissumik suliarineqaruni isumatusaarnerussaaq. Suleqatigiit arlaannaannulluunniit attuumassuteqaratik immikkut ilisimasallit suliaasaqarfimmik tamakkerlugu misissuisussat, ataatsimoortumillu aaqqissuusseqqinnissamut kingusinnerpaamik 2026-mi innersuussuteqartussat pilersinnissaannut suliaq Naalakkersuisut aallartereerpaat.



Utoqqalinersiallit sulinnarnissaannut aaqqissuusseqqinnerup pilerinarnerulersitsinissaanut, immikkullu ilisimasallit massakut malittarisassaasunik, matumani aamma appariartuaartitsinissamut periaatsinik misissueqqissaarnissaannut, naliliinissaannullu isumaqataavugut. Naalakkersuisut siunnersuutiginiikuuaat, appariartuaartitsinissamut killissanik naleqqussaaneq aaqqissuusseqqinnermut ilaatinneqarsinnaanersoq, immikkut ilisimasallit immikkut misissussallugu suliakkerneqassasut. Tamanna aaqqissuussinermi aningaasaqarnermut, naapertuilluarnermullu eqqarsaatiginnilluni isumatusaarnerullunilu akisussaassuseqarneruvoq.

Aaqqissuusseqqinnermi ataasiinnaq iluarsineqarani, utoqqalinersiaqartariaatsimut tamarmut pitsanngorsaataasumik aaqqissuusseqqinnerup tamaat isiginnissuseqarnissaa qulakkiissavarput. Utoqqartatta toqqissisimanartumik aningaasaqarnissaannut, kissaatigigunikkullu tapersiissuteqarnissaminnut kiffaanngissuseqarnissaasa qulakkeernissaanut tamanna aqutissaavoq.

Taamatut oqaaseqarlunga Naalakkersuisut allannguutissatut siunnersuutaat Demokraatit tapersersorpaat, siunnersuullu Ilaqutariinnermut Peqqissutsimullu Ataatsimiititaliami oqaluuserineqassasq inassutigalugu.